

Sujet: **Bebbi leaks**

Ich waiss öbbis, wo Du nit waisch!

Ach' wie gut, dass niemand weiss,
dass ich Rumpelstilzchen heiss!

Daas Gschichtli vo dämm glaine Kärli,
uss däm fyyse, bööse Märli,
isch überhoot und lengscht passé,
denn Ghaimnis git's hüt kaini meeh!

Es herrscht e grosses Unbehaage,
daas muess me aifach dütlig saage.
Dr Orvell Schorsch, falls dä no kennsch,
het daas voruss gseeh mit em Mensch,
Vorussgsait, waas is d'Zukunft bringt
und Rächt g haa, so wie's übr'all stinggd!
Wenn überwacht wird Daag und Nacht,
die ganzi Ethik zämmegracht,
wenn Jeede waiss, waas är nit sott,
au daas, woon är nit wüsse wott.

Mir mien Di vor dämm Zeedel warne,
due Di mit ere Larve tarne,
versteggsch' bym Lääse nit dy Gsicht,
waiss gly die ganzi Wält dy Gschicht!
Dä Zeedel isch fyys präpariert,
en Aug' het's, wo Di regischtriert,
waiss noochhär alles über Di,
waas bisch, waas kunnt und waas isch gsi!
Mer hänn is mit em Netz vernetzt
und abgloost, waas nit jeede schetzt
und daas verzelle mir Euch jetzt:

Es isch glaasklar, real, kai Bschiss:
s'het Jeede hüt vor Jeedem Schiss.

Mir Bebbi Leaks dien überwache,
erfare so die schlimmschte Sache,
sinn mit dr ganze Wält vernetzt,
wo Jeede geege Jeede hetzt.

D'Wälkugele duet bym draije zittere,
wenn Bebbi Leaks duet umme twitttere
und wird wohrschnig gly versplitttere!

Schrott git's jetzt nümme nur im All,
Dangg Facebook git's en überall !

Mir wüsse über Offshore Bschaid,
waas d'Schnyzge-Ammann uns nit sait,
wenn är sich uuseschwätzt, so bider,

isch är is als wie meeh zuwider

und d'Widmer-Schlumpf, dr Frau Bundesroot,
sinn d'Schueh z'grooss, wo si dernäabe stoot.

Bym neue Papscht waiss me, är syg
jo gar kai rächte Katholik,
är syg, z'wenig inquisitorisch,
waas für dää Glaube, glaub e Gfoor isch...

Mir hänn by de Yankee infiltrert
und au bym Herr Barak spioniert,
über dä Schwarz' mit wyssem Gwusse,
isch's nämmlig soo, dass muess me wüsse,
ass dr Obama, wenn's dr Fau nit gooht,

zur Noot uff anderi Miggeli stooht.

D'Frau Merkel mit de groosse Bagge,

drait wääge dämm so langi Jagge.

Und d'Fraue by der BVB,
hänn vom Diräggder alles gsee...

Nüt Neu's findisch bym Comité,
doo het au Bebbi Leaks nüt gsee.
Die Neue sin glych wie die Alte,
dien arm-säälig s'Alt verwaltet,

si lüpfe fründlig ihre Huet,

denn gseesch' dr Kopf und wenig Muet.

Bi Bebbi Leaks bruuchts nur Sekunde,
scho hämmer falschi Fümfer gfunde.

Bi dr Regierig gseet's e Blinde,

wo nit vyyl isch, kaasch nit vyyl finde.

Waas fähilt isch alle scho bekannt,

bym Hampe Wessels dr Verstand.

Daas Chaos in uns'rer Innerstadt,

findet z'erscht in syner Biire statt!

So aim, wo statt regiert nur zündet,

het s'Volgg scho vor de Waale kündet...

Bim Morin isch's extreem verworre,
grien isch dä nur hinter de Ohr.

Z'bequääm isch au dr Carlo gsässe,

het halt vergässe, waas är bsässe,

drumm het dr Carlo druuriig gsait:

Entschuldigung, ich due mir laid...

Egaal, waas mer au uusefinde,

die maischte dien sich uusewinde.

Nur ains erfaahrsch' nit über Twitter,

wenn's yyschloot bim finale Gwitter,

ach' wie gut, dass niemand weiss,

Dr Link zue uns'rer letschte Rais !